

Ministri blong Edukesen, Ripablik blong Vanuatu

**STANDAD LONG STRET
FASIN BLONG WOK BLONG
WAN ELI JAEHUD TIJA**

Wan Profesen We i Soem Se Yu Kea.

Fas toktok

I bin kat wan pepa i kamaot we i stap tokabaot ol standad blong wok long ol tija long Saot Pasifik. Pepa ia i blong mekem sua se ol tija i rispektem ol Konvensen blong Unaeted Neson (UN) mo ol lo mo fremwok long saed blong Edukesen long Pasifik rijon (A South Pacific Teachers' Code of Ethics)

Ministri Blong Edukesen i bin usum pepa ia blong priperem ol Standad ia blong ol Kindy tija long 6 Provins long Vanuatu. Pepa ia bai i sapotem ol tija we komuniti i bin askem olgeta blong wok, blong mekem sua se taem ol tija i stap wok wetem ol pikinini, o wetem ol komuniti bai oltaem i mas wok long wan stret fasin we i soem profesonal kea mo trast.

Ol smol pikinini oli no kat paoa o skil blong protektem olgeta long ol denja so i mekem se ol kindi tija ia i mas kat wan gud fala relesensip wetem olgeta pikinini ia blong oli save trastem ol tija blong lukaotem gud mo protekem gud olgeta.

Standad ia i stap blong mekem sua se i kat kwaliti taem tija i stap wok wetem ol yangfala pikinini, i kat nid blong mas kat wan ples we i sef mo i kat ol aktiviti blong mekem pikinini i wantem lan, mo tu tija i mas enkarejem ol parens blong tekem pat long wanem ol pikinini i stap mekem. Tija i mas kat trast mo rispekt long ol narafala tija tu.

Standad ia i stap tokbaot ol stamba valiu blong wan gudfala tija mo i save gaedem tija ia taem hem i stap wok mo sapos hem i kasem sam problem long wok blong hem. Standad ia bai i no save kivim ansa long everi problem be bai i save kivhan long tija blong lukluk mo tingting strong long wanem nao stret rod blong fiksip problem ia.

Yumi hop se bai standad ia bai i save givhan blong gaedem fasin blong ol tija everidei taem oli stap wok wetem ol pikinini, ol narafala tija mo wetem komuniti.

Standad ia i blong mekem sua se pikinini fastaem, mo ol aktifiti blong tija o lan i focus nomo long pikinini .Hem i impoten blong andastan se laning i save tekem

ples ol taem long eni ples: insaed o aotsaed, long vilij o long taon, long ol miting ples o narafala ples. Standad ia i save aplae eni taem long eni ples we i kat tija wetem ol pikinini, ol fren mo ol memba blong wan komuniti i stap.

Impoten samting abaot standad ia i blong mekem sua se bai i no kat wan tija i save mekem pikinini i harem nogud o kivim kil long wan pikinini. Yumi mas protektem ol pikinini ol taem mo mekem oli filim sef ol taem. Tija i mas oltaem rispektem mo honorem wok blong hem mo hem i mas krietem wan sapatif, kearing mo gudfala environmen blong everi pikinini i save lan long hem.

Ol Valiu

Ol valiu i wan impoten pat long standad blong ol tija. Ol Kindi tija long Vanuatu we oli stap tijim ol smol pikinini oli mas mekem sua se oltaem olgeta i:

1. Valiu, selebretem mo rispektem wan wan pkinini se oli spesel.
2. Valiu mo rispektem ol lokal Jif mo ol komuniti lida.
3. Valiu mo andastanem rol mo risponsibiliti blong ol perens mo relesensip blong olgeta wetem ol pikinini blong ol.
4. Valiu mo promotem Venekula lanwis, kalja, envaeromen mo ol kastom blong komuniti we oli wok long hem.
5. Valiu mo komitim olgeta long wanem we i stret, i raet blong wan wan pikinini mo fiksिम eni samting we i save mekem pikinini i harem nogud.
6. Rispektem ol narafala tija long wok blong olgeta mo mas wok long wan stret fasin oltaem.

Ol tru tok

Ol toktok ia i stap blong helpem mo gaedem wan Kindi tija long komitmen blong hem long everidei wok we hem i stap mekem wetem ol smol pikinini.

Risponsibiliti blong yumi long ol Pikinini:

1. Everi pikinini i mas kat janis blong kat wan kwaliti edukesen.

2. Everi pikinini i mas usum fes lanwis blong olgeta sipos yumi wantem se oli rispektem kalja mo kastom olgeta.
3. Yumi mas tritim everi pikinini i sem mak nomata long lanwis, rilijon, gel o boe, wanem kaontri, o sipos i kat disabiliti o no, i kam long wan rij o poa famili.
4. Everi pikinini i mas kat janis blong kasem ol difren stael blong tijing blong helpem olgeta wetem laning blong ol.
5. Ol akitiviti blong pikinini i mas stret long wanem pikinini i save mekem long yia mo developem blong hem.
6. Ol pikinini we i kat spesel nid yumi mas tritim olgeta wetem rispekt mo helpem olgeta blong oli ko tru long kindi.
7. Everi Kindi tija i mas save se ol eli yia blong pikinini hemi impotan tumas from se brain blong pikinini i stap develop kwik tumas.
8. Yumi mas obsevem gud ol pikinini mo asesem olgeta blong faenem aot ol pikinini we bai oli nidim spesel help o sapot.
9. Everi tija i mas jenjemfasin blong wok blong olgeta folem ol niufala risej mo save long saed blong Eli Jaelhud Edukesen.
10. Everi tija i mas mekem sua se oli provaedem wan sef, helti, kreatif mo motivating enviromen blong pikinini i wantem lan.

Responsibiliti i ko long olgeta Perens, Komuniti memba mo Sosaeti

1. I mas kat trast mo rispekt i stap oltaem bitwin ol tija mo ol perens, komuniti mo ol narafala man.
2. Oltaem i mas kat janis blong ol toktok mo fidbak wetem ol perens, komuniti mo sosaeti, long wan wei everiwan i save givim ol gudfala tingting blong hem.

3. Ol tija i mas save serem ol fidbak abaot ol prokres blong ol pikinini long ol perens long wan wei we i positif.
4. Yumi mas enkarejem ol komiti blong kindi blong andastanem rol mo risponsibiliti blong olgeta, mo yumi mas luk save had wok blong olgeta.
5. Bai oltaem ol kindi tija i mas sapotem gud ol perens mo ol komiti blong Kindi blong oli save se i gud blong oli stap kam tekem pat long edukesen blong ol pikinini blong olgeta.
6. Long ol toktok o miting blong yumi wetem ol perens, komuniti mo sosaeti yumi mas oltaem promotem eli laning se hemi impoten tumas.
7. Yumi mas oltaem protektem mo rispektem lanwis, kalja mo kastom blong komuniti mo sosaeti blong yumi.

Risponsibiliti blong wan Profesonol Tija

1. Everi kindi tija i mas wok gud tugeta long wan profesonol fasin wetem ol narafala tija.
2. Everi kindi tija i mas wok tugeta wetem rispekt.
3. Everi kindi tija i mas wantem kam tekem pat long ol kos we Ministri blong Edukesen i stap givim blong helpem olgeta long profesonol developmen, mo blong soem wan strong komitmen blong wantem serem ol niu save wetem komuniti ia.
4. I mas kat bigfala rispekt mo gud fasin oltaem long ples blong wok.
5. Everi kindi tija bai mas stap usum ECCE polisi blong Ministri blong Edukesen, mo usum ol prokram blong mekem sua se everi pikinini i save kasem wanem oli sapos blong lanem mo oli save kat wan gudfala risol.

6. Ol kindi tija i mas wok oltaem wetem Ministri blong Edukesen blong mekem se taem pikinini i muv i ko long klas wan bai i isi long hem. Wok klosap wetem ol tija blong klas 1-3 skul blong mekem se pikinini i redi gud blong ko long praemeri skul.

Smol toktok: Wan bigfala tankiu i ko long olgeta we i bin putum ol tingting tugeta blong priperem “ A South Pacific Teachers’ Code of Ethics”, we UNICEF, Edukesen Intenesonal mo Kaonsel blong Pasifik Edukesen i sapotem